

小樽高等商業學校			
小樽高等商業學校圖書館			
總			九
一		止	門
二		意	三
八		考	
九			
號	冊	號	部



方正學先生遜志齋集卷之五

方正學先生遜志齋集卷之五

南京操江都御史嘉善丁賓

南京翰林院孔目徐和錢養庶 全校

南京鴻臚寺卿歸安錢完

南京禮部司務仁和羅大冠

南京掌翰林院副餘姚孫如游

後學 上元姚履旋參閱

十九世裔 孫方永祥重刊

雜著

夷齊

聖人之道中而已矣堯舜禹三聖人為萬世法一允執厥中  
也不及不謂之中過亦不謂之中請即此而論之伯夷叔齊  
孤竹君之二子其父將死遺命立叔齊父卒叔齊遜伯夷伯  
夷曰父命也遂逃去叔齊亦不立而逃之其後周武王伐商  
去隱於首陽山恥食周粟遂餓而死孔子嘗稱之曰古之賢

方正學先生遜志齋集

人孟子嘗稱之曰聖之清誰得而議之哉雖然抑有說也先君之國受之於祖宗者也父之傳次以嫡以長古之制也易此必亂昔周太王三子長泰伯次仲雍次季歷太王欲傳位季歷以及昌泰伯知之即與仲雍逃之荆蠻以順父志以成王業孔子稱之以至德且曰民無得而稱焉夷也苟知父志欲立齊當效泰伯順父之志隱然退避於治命之曰不當行己之志顯然辭讓於亂命之餘也叔齊亦不立而逃之幸有中子以託國焉苟無其人其如先君之社稷何湯武之征伐即堯舜之揖讓天下歸周天之命也潔身自遠斯可已矣何乃恥食其粟獨食其薇也庸非周土之毛乎斯皆過乎中者也於乎廉頑立懦足可爲百世師過中失正恐未臻乎堯舜禹之道此孟子之所以譏乎其隘而孔子至德之稱在泰伯

而不在夷齊也厥旨深矣

有子

孔子既沒天下之好爲言論皆自托爲孔子之徒而竊擬其說以折衷義理之得失至孟子時相去猶未遠而其言已紛然淆亂不可勝辨孟子每深斥其非然亦不能止也不幸重之以秦火孔子之微言幾不復存於是儒生愈無所憚肆口恣意摹效語言不特托爲其位而直以孔子自命孔子之言滋以不醇今雜出於諸子家語禮記之書者多附會鄙妄不可盡信者也然孔子時詩書錯繆賴孔子修而定之故人不惑於邪說今孔子之言乖亂甚矣後世無聖人者作則其說何由而有定耶猶幸其出於道術不明之時其論不能精深故學者得以窺其缺漏而知其爲僞不然其禍可量也耶喪

通志彙編 卷之五  
欲速貧死欲速朽未必爲孔子之言然未爲甚過也有子聖人之徒奚於此而疑之以中都棺槨之制而謂不欲速朽以命子夏冉有之荆而疑不欲速貧此尤誣聖人且誣有子也孔子之於仕止皆曰有命何汲汲於得位而先之以子夏與冉有耶使孔子誠急於仕乃急於行道也豈爲不欲速貧哉爲貧而謀仕於蠻夷之地矧且趨焉惟恐不得者鄙夫之所爲曾謂孔子爲是乎四寸之棺五寸之槨攷諸王制參諸人情使君子致仁愛於其親非特不欲速朽也欲速朽者自爲之道不欲以身爲天下費也棺槨之美者事親之道不敢以天下薄其親也二者固各有當矣有子賢而知道者奚疑於此而非之此不惟非孔子之事決非有子之言也孔子之道猶天之賦物物受之者各異而因其所受者皆足以有成故

其言近而未嘗不該乎遠淺而未嘗不極乎深上而可通乎下粗而可泝其精及其門者惟顏子庶乎近之而未至也孟子以下皆未免滯而未化矣有子未及孟子其言豈能似孔子哉爲是說者非惟不知孔子亦未知有子者也故觀論語春秋者當因其辭以求聖人之意觀禮記諸子者當以聖人之意折衷其詞

### 鬻拳

鬻拳以兵諫楚文王而自刑左氏稱之爲愛君余謂不然君臣之際固有常道矣賢者之事君不爲違道之行以危身不爲難繼之事以駭世順其常不徼異名守其職使後可法如斯而已不敢僥倖以圖志之必達事之必成也故君有過舉則積誠以諫三諫而不從則避其位而去之安可臨之以兵



脇之以威而劫其君哉語之而不聽則讐懼之咄咤之俾不敢肆此制嬰兒之術耳烏有北面事君而以嬰兒視之哉先王立爲上下尊卑之分俾爲臣者嚴守之而不敢僭所以杜亂也馬之在原野三尺牧豎鞭之而無罪及加羈勒而入君之閑雖國之貴臣不敢視其齒而蹴其芻豈誠重馬哉尊其爲君之所御也齒馬蹴芻細故也先王所以嚴爲之禁者其慮天下深矣況以兵劫其君者乎或謂君爲非義則將危社稷大臣以安社稷爲心行權以格君宜若無罪焉是豈得爲權哉事固有可以行權者矣然賢者猶難之若君臣父子之分天下之大經也父暴而違道子烏可行權而辭父乎舜聖人也瞽瞍頑夫也舜視其父之惡夔夔然順之不敢見於色設於辭舜豈不欲格父哉盡子之道而使父化乃所以格父

也紂之暴可謂甚矣箕子紂之戚微子紂之兄二子皆賢人也至親且賢事暴君而不敢失人臣之禮或屈而爲奴或待其亡而去之二子豈不知社稷重於君乎終不忍劫其君者知君臣之大經重於社稷也鬻拳之君雖有過非紂之甚鬻拳爲臣非若二子之親且賢乃忍劫其君而不顧蓋激於小忠而不知大義者也焉得爲愛君乎君子之子奪人將以法戒於後世不可苟也劫君而謂之曰愛君將使奸臣亂賊欲行篡弑之事者皆挾愛君之名以自文其禍後世可勝道哉然固左氏啓之也

鄭靈公三首

天下之事成於大度之君子而敗於私智之小人智之於人固可以成事然用之以私意則流爲詭詐險測而智能之士

莫爲之用故惟足以取敗大度之士其計謀畫策未必過於私智之人惟其度足以容物故有智者爲謀有力者爲戰有才者爲之治所爲無不成所欲無不得蓋惟不自用其智乃能役舉世之智而私用其智者適足爲眾智役此事之必致者也人之度量相去亦懸殊矣世有棄萬金如涕唾者亦有吝杯羹而不肯與人者自棄萬金者言之則己之所處者大而他人爲愚自吝者言之未必不以己爲智而笑他人之妄也周衰諸侯之事亦多吾觀鄭靈公之死未嘗不深哀其智之小而笑其失君臣之道至於不忍杯羹之故而殺其身也且靈公非愚也其不與子公之羹亦非誠吝也特忿子公之笑而言夢爲輕也故不與之羹使其夢無徵而乖其素望此兒女子相詭之恆情小人譎詐之私智爾子公怏怏而染指

笑而赦之召而賜之可也靈公欲殺之則過矣苟知其心不忠果不利於宗廟正其大罪而誅之亦可也卒不能決遂死於子公之弑計其所爲豈不愚甚矣哉君臣之際難矣尊卑之禮不肅則必至於僭上下之情不洽則必至於離惟賢士能嚴其分於朝廷會同之時而洽其情於私覲燕享之頃朝廷之儀或有不欽雖親賢有所不避燕享以和樂爲本苟察其末節細禮而罪之則人人自危篡殺之事或階之以起故當容之以寬推之以恕使人咸得盡其情則嚴不至於離而和不至於僭矣靈公旣不能預嚴君臣之分陵夷至於鼎俎之前而方責之小禮逞詭詐之智斬於杯羹以取強臣之憤其致殺身豈足怪哉故卮酒杯羹微物也善用之可以重於茅土之賜不善用之干戈醜毒皆由於此人君自非以度容

天下而挾小智以御其臣雖食之以大牢皆鄭靈公之續耳豈足爲智哉

御臣之術難矣御小臣之難不若御大臣之難御大臣之難不若御權臣之難也小臣有善賞之可也有過罪之可也大  
臣有功而賞之浮於功則驕不稱其功則怨有過而罪之當其罪則怨不當其罪則肆然猶不敢爲亂也至於權臣則不然其威足以懾百姓其勢足以脅人主其喜怒足以爲禍福故善御權臣者能陰銷其威而使國之大柄歸於己者上也其次則莫若制之以禮嚴之以分惠之以恩使自戢其權而不至於僭又不能然則不取其怨怒而已取其怨怒則危矣世之取權臣之怨怒者非爲責其政事而然也非爲詰其專橫而然也其始出於爭不急之小務蓋侮慢之私智怨蓄於

纖微芥蒂之中而禍發於篡國弑君之大昔之所聞不可勝道而靈公之於子公尤其最著者也子公之爲鄭卿蓋久矣靈公始立而爲君德澤不加於境內威令未信於朝廷其於國之權臣宜撫之防之徐而收其柄銷其威然後國可得而治也不勝其一笑之憤斬杯羹而不與以取怨卒致弑逆之禍烏得爲智乎今夫吾力足以勝人而後嘲之侮之唾罵之以致其怒故每鬪則勝苟不自量而好侮有力之人未有不勝於人者也況子公者久執鄭國之政於嗣君之立得杯羹之賜則夸以爲榮決然而斬之不與甯不失其素望而慙同列之人乎雷同而受辱雖鞭撻不足較而恥一人於千百人之中其辱甚於死何者恐爲千百人所笑也況子公斗筲飲食之人而挾無上之器其得志於杯羹則喜否則爲亂固小

人之常情其罪安足論乎獨靈公之失則世之御權臣者所宜知也昔者漢文帝以諸王入繼國統絳侯周勃挾誅呂氏之權常有德色帝待之益莊一旦臨朝而問錢穀決獄之數勃不能對慙媿流汗遂謝病不敢居相位不責其德色之不恭而引職事以問之若文帝可謂能御權臣矣蓋勃之功烈聲威素行於臣民苟責其不恭其心怏怏未必服禍或因之以起矣吾固假之以寬置而不問而以其職問之文帝豈不知不能對哉出其不意問其所當知使其不對而自慙慙而不敢怨怨而不敢怒其驕慢之虛氣至是索然銷鑠而無餘天下之大柄不待發於聲色而盡歸於己雖有勃輩十百亦無足異矣此其得御權臣之道者也使鄭靈公有文帝之行烏有殺身之禍哉後之人主不幸而遇權臣以文帝爲法而

以靈公爲戒庶乎其無患矣

豫讓

士君子立身事主旣名知己則當竭盡知謀忠告善道銷患於未形保治於未然俾身全而主安生爲名臣死爲上鬼垂光百世照耀簡策斯爲美也苟遇知己不能扶危於未亂之先而能捐軀殞命於旣敗之後釣名沽譽眩世駭俗由君子觀之皆所不取也蓋嘗因而論之豫讓臣事智伯及趙襄子殺智伯讓爲之報仇聲名烈烈雖愚夫愚婦莫不知其爲忠臣義士也嗚呼讓之死固忠矣惜乎處死之道有未忠者存焉何也觀其漆身吞炭謂其友曰凡吾所爲者極難將以媿天下後世之爲人臣而懷二心者也謂非忠可乎及觀其劔三躍襄子責以不死於中行氏而獨死於智伯讓應曰中行



民以眾人待我我故以眾人報之智伯以國士待我我故以國士報之卽此而論讓有餘憾矣段規之事韓康在章之事魏獻未聞以國士待之也而規也章也力勸其主從智伯之請與之地以驕其志而速其亡也締疵之事智伯亦未嘗以國士待之也而疵能察韓魏之情以諫智伯雖不用其言以至滅亡而疵之知謀忠告已無媿於心也讓既自謂智伯待以國士矣國士濟國之事也當伯請地無厭之日縱欲荒棄之時爲讓者正宜陳力就列諄諄然而告之曰諸侯大夫各受分地無相侵奪古之制也今無故而取地於人人不與而吾之忿心必生與之則吾之驕心以起忿必爭爭必敗驕必傲傲必亡諄切懇告諫不從再諫之再諫不從三諫之三諫不從移其伏劍之死死於是曰伯雖頑冥不靈感其忠誠庶

幾復悟和韓魏釋趙圍保全智宗守其祭祀若然則讓雖死猶生也豈不勝於斬劔而死乎讓於此時曾無一語開悟主心視伯之危亡猶越人視秦人之肥瘠也袖手旁觀坐待成敗國士之報曾若是乎智伯旣死而乃不勝血氣之悻悻甘自附於刺客之流何足道哉何足道哉雖然以國士而論讓讓固不足以當矣彼朝爲仇敵暮爲君臣覲然而自得者又讓之罪人也噫

樂毅

樂毅不拔二城夏后太初以爲庶幾乎湯武蘇子瞻以爲行王道之過余曰鄙哉二子之言也天下豈有行王道而不興者乎觀人之賢否當先觀其所爲之事求其事而不得當求其用心之邪正湯武所以伐人之國其心曷嘗有利天下之

意乎不忍斯民之困於塗炭挾大義而拯救之使取錙銖之非義殺一介之不辜雖奉海內之籍而歸之湯武不肯正目而視也其心顯然著於天地之間故拔一城取一國他國之民惟恐其來之不速翹足舉首而望之此其為王者之師也使湯武之心少出乎利匹夫匹婦將持耒鋤而逐之矣何以為湯武哉彼樂毅之師豈出於救民行義乎哉特報讐圖利之舉耳下齊之國都不能施仁敷惠以慰齊父子兄弟之心而遷其重器寶貨於燕齊之民固已怨毅入骨髓矣幸而破七十餘城畏其兵威力彊而服之耳非心願為燕之臣也及兵威既振所不下者莒與卽墨毅之心以為在吾腹中可一指顧而取之矣其心已肆其氣已息士卒之銳已挫而二城之怨方堅齊民之心方奮用堅奮之人而禦意肆已挫之讐

毅雖百萬之師固不能拔二城矣非可拔而姑存之俟其自服也亦非愛其民而不以兵屠之也誠使毅有愛民之心據千里之地而行仁政秦楚可朝四夷可服况蕞爾之二城哉湯武以一國征諸侯則人靡有不服毅以一國征二小邑且猶叛之謂毅為行王道可乎湯武以義而毅以利成敗之效所以異也蘇子乃謂王道不可以小用小用之則亡王道特患乎人之不行耳小用之則小治大用之則大治猶之菽粟之療饑小食之則不死恆食之則充實奚可謂菽粟不可少食而寧噉糠覈之為愈乎大勅曲士不尺論獨惜蘇子之易於言也

曹參

天下有不治之治而君子有無功之功非通乎道者不知也

人皆知治之可以治也而不知求治而得亂人知有為可以成功也而不知有為適足以獲罪者功與罪固非人臣之所計而治亂之來不可不審也孔子曰如有王者必世而後仁昔甚疑之以為王者之於仁宜其致之速矣待歷世而後仁及觀乎古之求治太急而致亂然後知孔子之言百世不能改也夫民新脫於創殘之中不休息之於無事而遽騷之以制度文為之說使勉而從我則所以仁之者乃所以暴之耳凍溺之人不可以近火久餓之人不可以飽食出溺而近火者必僵餒甚而飽食者必死且火與食者皆有殺之之心哉求其速生乃速其死之道也故善治天下者先以不治治之曹參之相惠帝日以飲酒為樂掾吏縱刑置而不問弛然不復加意於政教朝廷之間幾於亂矣而海內以治何邪若參

可謂知治亂之方矣秦之亡不在乎無制而患乎多制不患乎法疎而患乎過密使參而相漢復苛推而詳禁之是續亡秦之焰而熾之也故參甯受無功之名而不忍圖有功以禍當世則利澤陰施於斯民民安於漢而不離漢業藉以久遠者參之功也史以參比蕭何參亦自謂不及然何非參比也何智謀雖過於參而不學故干戈甫定而役民大治宮室其意務媚於主而無撫民之心參苟居何之任必不為此以何代參則何亦不能如參之明於國體而無所變更也漢苟無何則參之才足以立法苟無參而他有才者繼之則漢之法亂矣天下易得也而安之為難安之為易也而使民安於吾之法為甚難參豈嘗聞君子之道矣故其所為近道如此而先王安民制治之大法固不止如參之所為而已也於乎道

之不行也久矣哉

婁敬

將興之主惟恐人之無言將亡之主惟恐人之有言天下固非一言所能興亡也求其興亡之故未嘗不自一言始以一言之善而取之天下之賢者必曰取善若此是之周也吾奚爲而不言以一言之非而罪之天下之賢者必曰其諱過若此之甚也吾曷爲而與之言人皆欲告以善是集天下之善於其身也人不欲告以善是以其身推天下之善也有此二者而欲不興亡皆不可得也漢高帝以雄武之姿匿智下意以用當世之俊傑旣夷剪海內可畏者而廓清之亦可以少休矣聞婁敬遷都之說卽奉宗廟百官而從之夫敬徒譎之虜布衣之人山東之賤夫耳語其辨不若陳陸語其智不若張

蕭無夙昔之故左右之屬卒然脫輓轡而入見若涉無人之廷而論國之大事其術可謂甚疎其禮貌可謂甚野矣在廷之臣見其言論心且笑其婁而帝卽曰下詔與之俱西如不能視者從相之言不能聽者觀人之指屈天子之貴斂絕世之威而惟敬之信當時不以爲輕動後世不以爲無謀而子孫果安其利是知善不必自已出貴乎能用人之善人君不必兼眾人之所長在乎因人之長而用之高帝之才非能遠過於人也智非能慮事而皆中也其不可及者有容人之量也唐太宗好學有謀愈於高帝然所爲不及帝之盡善者量不若也能用魏徵之言智矣而幾致不能容徵誅蓋蘇文而伐高麗武矣終以不用道宗之言而敗太宗器量狹以能勉強從善故致貞觀之治及功成治定驕氣漫盛而無以制之



故量盈而惡人之言古之聖人明道以勝私使其心海受而天覆用其善不計其他取其智不忌其名任其力不奪其功恭默南面若無能然而舉世之賢才咸為之盡而莫敢負之天能使賢才皆為己用則其所為與出於吾心何以異乎高帝常自謂能用三人傑故勝項氏三傑帝素所重者用其言為甚易未足以見帝之美疎賤如婁敬而用之不疑此漢之所以興也

條侯傳論

天下之賞罰必有所受受於人者必制於人大夫受於諸侯諸侯得以賞罰之諸侯受於天子天子得以賞罰之惟天子之大柄受於天而天不屑屑然與之較古之聖人恐其無所畏而肆也於是立史氏以書之史氏者所以賞罰天子而立

天下之大公於世故天子之所賞而濫天下莫敢問史氏得以奪之天子之所罰而僭天下莫敢言史氏得以予之天子之身所為有當否乎其下者莫敢是非也史氏秉大公之道是非之故天子之賞罰信於當時史氏之賞罰信於萬世天子之賞罰可以賤貴一世之人而史氏之賞罰可以懲勸於無窮榮辱於既死君子謂史氏之柄不在天子下彼以其位此以其公也使史氏之予奪而不以其公後世何所取信哉漢初輔相之臣多出於一時亡命屠販刀筆之流其人皆習熟世故迫於利害善避禍趨變而堅守臣節求諸高惠文景四世間如王陵周亞夫輩無數人而亞夫尤得大臣體在景帝時以爭皇后兄信及匈奴降王之封忤旨遂用他事下獄以死夫封無功者以亂先帝之法納夷狄之叛臣以啓為臣

不忠之心此誠宰相之所宜爭也亞夫爭之豈為過哉彼景帝者私刻忍人也欲封其后之兄而亞夫不從其心固有殺亞夫之端矣特未得其名耳及降王而不封其怒宜愈甚特無以屈其說故忍而未發官甲楯之告景帝方幸其有名以誅之遂卒實之於死求其所為事確乎有大臣之風景帝罪之者私恨也為史者宜有以明之而司馬遷反詆之為守節不遜以取窮困嗚呼人臣如亞夫乃可謂之不遜乎夫朝廷之禮君臣之分固有當遜者矣至於為一事而亂舊典起邪心為害於國甚矣苟阿意希旨從而附和之此小人反覆之計謀一身而不顧職業之所為烏可謂之不遜乎人臣者以義守職以忠事君利害有所不恤苟畏窮困而安利達則無所不至矣亞夫之心豈以窮困為戚者哉遷不稱其能守官而

詆其不遜不閔其死不以罪而悲其困窮史氏之論若此何以信於後世此吾嘗論遷善紀事而不知統善陳辭而不能斷有良史之才而不達君子之道亞夫傳之類也

霍光

霍光以樸直見知武帝輔少主廢昌邑立中宗功烈為漢伊尹而身死受赤族之誅世嘗疑之曰是烏足疑哉光之獲全其軀亦已幸矣賞罰生殺予奪者天之大柄授之天子使奉而行焉者也故是六者惟天子得專之然猶不敢私任其喜怒好惡以為輕重而一決之於天功懋焉而後賞曰非我賞之也天賞之也罪盈焉而後罰曰非我罰之也彼得罪於天也其於生殺予奪莫不裁之於天而不敢預存於心以可專之位持之以恭謹至於如此猶且或有不中禍及於身而殃

及乎子孫況於無其位者乎且以伊尹之聖以德則天下莫  
加以位則爲之師而當阿衡之任以功則相湯取天下致太  
平三世而至於太甲其格於天而著於民亦已久矣其於太  
甲也未嘗廢之特奉之居憂於先王冢上俟其修德而迎之  
以歸其於進退宜無不可時之人孰敢非之然而伊尹既復  
政於君卽決然請去其位不敢畧有顧戀遲留之心何者誠  
知天之大柄不可以久持也夫伊尹聖人不任其私以賞罰  
生殺予奪亦昭昭矣猶畏且慎如此彼霍光者自度何如人  
哉以德則僅若恆人以功則非有平暴亂安宇內之績特以  
謹愿偶爲人主所信而托以非常大事計其平日操天子之  
柄以制羣下者幾何年矣其於輕重緩急已不能無私意行  
於其間乎哉疑行然立昌邑旣不審隨數而廢之天下之人

見其所爲蓋已側目視光者久矣非特天下之人吾意中宗  
未立之時亦疑光之爲人矣不待參乘而後疑之也爲光計  
者當中宗之初立社稷宗廟旣有所托不負先帝願屬之心  
卽宜力辭而引去不許則宜辭朝廷之政不與而以列侯就  
第庶可少紓中宗之疑而息眾庶之怒光則不然一歸政而  
不受則肆然而居之至於身死而後已且中宗是時年近壯  
矣其於民情國體究之熟矣光曷不思乎當昭帝之初立燕  
王上官之變非昭帝之明光之誅其得免乎在執政未久之  
時且若此更廢一主之後其生殺予奪賞罰之際妄用者多  
矣使重有告於中宗光其可免乎吾故曰光之不底於戮幸  
也以其昧於去就之義而不知天之大柄不可僭持也雖然  
光不學無術其昧於去就不足責也中宗之得光宜亦不能

通志卷之五  
無過焉當歸政之時封之以上國榮之以顯號優游以師傅  
之禮而擇其之權使光有明哲之知禹雲山  
等知威權之不可以太盛而思退戢之道焉光身死之餘豈  
有赤族之禍乎故赤族之誅不在禹雲山謀逆之時而在光  
秉政之日中宗之疑霍光不在許后之死而在平廢昌邑之  
時故取族滅者非禹雲山也光也光之得罪於天非廢立也  
僭持天之大柄也嗚呼世有不幸而屠光之任者得吾言而  
思之其可免於禍乎

丙吉

君子之於天下盡人事而後徵天道天道至微而難知也人  
事至著而易爲也舍易爲而求難知則爲不知先其微而後  
其著則爲失序堯舜禹益相告戒之辭詳矣傳道則曰執中

用人則曰九德治民則曰六府三事至論天道則歷象授時  
之外未嘗有片言焉三聖賢之於天道豈有所未達哉棄所  
宜爲而求之恍惚詭誕之域者固聖賢之所不取也宰相之  
職上有以格君下有以足民使賢才列乎位教化行乎時風  
俗美於天下倫理正而禮樂興中國尊而夷狄服有生之倫  
各遂其性而無乖戾鬪爭則可謂盡職矣不必漆漆然探其  
所難知以爲觀美也能盡其職雖日月失明寒暑不節無害  
其爲治職有未盡使天地位而萬物育亦安所益於民乎漢  
史稱丙吉不問死傷而詰牛喘以爲知大體此非君子之言  
民不知道至於相殺傷於都市之內政教不振而俗隳壞其  
爲變亦甚矣豈非宰相所當憂乎舍此不問而恐陰陽不和  
何其迂且妄也子路問事鬼神子曰未能事人焉能事鬼不



先盡事人之道而事鬼且不可況不務人物之性而徵不易  
知之天道烏在其能爲相乎且宣帝時俗之弊非特相殺傷  
而已一歲中子弟弑父兄妻妾弑其夫者二百三十餘人幾  
不可以爲國吉不能佐其主以仁義使革風易俗陷斯民於  
禽獸而惟一牛之間謂之知所緩急不可也漢儒之學泥於  
術數而不知道其流至於蔽而不通焉而信怪誕可稱如吉  
者猶溺焉而不以爲異況不足稱者乎天下猶人身然風俗  
血氣也灾祥肥瘠也戕刺其體膚而不問見瘡者而問之人  
必以爲惑矣察於細而忽於巨惑莫大焉而以爲知大體可  
乎然則洪範之說皆不足信歟非然也庶徵九疇之一也必  
以人事爲之本盡人事而後徵天道者吾之所知也信灾祥  
而遺人事者漢儒之謬洪範之歸也非君子之道也

### 黃霸

漢史稱黃霸爲相功名損於治郡時昔者嘗惑之謂豈有才  
如黃霸而不能爲相者乎後觀其爲張敞所奏然後釋然知  
其故蓋宣帝不能盡霸之才非霸不能也天下之患非才之  
爲難而用才者之爲難矣胸駟馱馱可以不載駕而致千里  
不遇善御之人雖欲一日百里不可得也宣帝善任守令而  
不善任相知愛民之情而不知爲國之體其天資善察好挾  
數以用而持法太嚴丙吉魏相之徒號爲賢相不過逡逡然  
行乎繩墨之內醇謹僅足而已非能有所創造施爲可爲後  
世法也豈三子之才止於此宰相之功業視人主人主善任  
相雖中才亦足以爲治不能任相雖後傑不能以成功霸之  
治郡時得以意操縱斷制行於民而達於境內故可以得人

心及入而為相欲飭法令則人將以為過欲行教化則人將以為迂欲守廉隅則人將以為拙沛然行於一郡而莫敢禦者今皆窒沮而不可惜乎雖有有為之才安能立不可為之功致不可得之名哉其敕上計吏之事教化之一端耳真宰相之所宜為古之人先務教化霸豈為過哉張敞遽毀訐之謂其教民為偽而宣帝亦遽聽之蓋宣帝之素志以為漢家自有制度從事乎督察苛刻之間而惡聞教化之說久矣敞之言正與帝意合故帝信敞不疑而尤稱其非霸雖有為其可復得哉王猛慧黠小才非有絕人之智越世之量符堅斬除異議之臣而親任之卒并疆國而雄視海內非猛難遇用猛者難遇也任人以位而不假之權猶不任也假之權而不用其言行其道猶無權也今霸治郡別為良吏為相則為

恆人任之以良吏之道彼則以良吏自效也束之以恆人之制雖欲不為恆人安可致哉噫才有餘而不用者士之責也

東漢

天下之患固不可逆料而預防之也吾計禁乎此後世之患出乎彼吾謀杜其西後世之患生乎東禍亂之端神藏而鬼伏常發於人所不疑之地而起於世所倚賴之人雖知者何由而盡備哉然古之善慮國家者每事揆其始而考其終喜其成而憂其敗四海之事千載之業綜包參覈於吾之胸中而定他日為患大小緩急推其得失而為之備使禍害之發不至於亂亡則庶乎可以盡吾心焉耳固非迷惑消沮能使

而無患也武王周公之初定天下其心豈不知封建之弊必至於并吞削弱而不振也哉然恐易此道而更爲異法未必若封建之可以安且久也故且勉而爲此使治之有道者可以無亂失其道者亦不亟至於亡不敢過爲矯激難守之法以爲將來患也乘舟而渡水時有覆溺者人終不以一溺而廢舟鷁馬行遠或有躓跌之失人終不以一跌而不駕在乎補其罅漏不完之處習其馳騁疾徐之節使慎之而已前漢王莽之篡在乎元成失道上無明主下無正臣故莽得恃太后之勢而行篡竊之計非以三公輔相委任之權太重而然也光武過懲其弊而力矯之不任三公以事而政歸於臺閣其後遂成宦寺之禍而漢卒以此亡光武以爲莽之得成其篡者權太重耳今吾奪其柄則其害可除矣孰知宦寺

之禍反有甚於輔相者乎此不熟究其大小緩急之故也夫莽之篡以母后臨朝外戚預政而致然豈委任太專之罪哉光武能著爲令典藏之宗廟俾後嗣有幼君在位當選厚德大賢之士爲三公以輔之而不許母后外戚臨朝預政則其害可以息矣不此之思而惟罷三公之制宦寺之興始於此矣蓋宦寺恆以傳聞閣之命受襦褌之寄而妄作威福苟外有良輔以持其柄內無母后爲之依怙雖曹節王甫充溢乎宮闈亦何患哉可疾者不疑而疑輔相末路之弊也遂使三公除拜皆以賂遺宦者而得雖欲免乎亡亦難矣三公之位古所謂共天職治天民者也苟擇當世之賢才而置諸位撫手而責其成功可也專橫之禍何自而致哉事變亦眾矣然不察之以至明推之以至公處之以至當徇斯須之細故而

輕於變更惜哉光武之銳於求治而未達乎大體也

漢章帝

治天下之患莫甚於矯前世之失而過於中天下之事可矯也而不可過也然矯之急者必至於過失火之家三日不熟食走而躓者終身不御馬躓與火豈馬與食之罪哉而為之不食不御此矯之過也蓋懲之甚者改必速畜之久者發必肆方其前人之所為不合乎心其心怍然思有以易之而未能一旦據可為之勢力矯其弊不暇顧理之是非則所失者愈多矣往昔之事類此者甚眾雖漢章之賢亦未能免乎此也魏曹丕謂明帝察章帝長者章帝豈真長者哉其天資亦明帝之流耳聞羣臣言前代過於苛刻故深矯之以寬其寬也或過乎中而時自出其所為又怪過乎嚴是以當時文

物典章雖有可觀者而朝廷幾於不治內則以皇后之譖殺四貴人而廢太子外則竇憲奪公主田園而不能加罪張林楊光恃勢貪殘而不知省鄭宏以太尉言竇憲而收其印綬以死此其失反有甚於明帝何足為長者乎漢之稱長者以其持心謹厚而無害以德化人而人自服之也若文帝者是也而章帝非其人也文帝嘗曰長者固殺人乎然則無罪殺貴人譴三公縱貴戚酷吏虐民而不問皆不得為長者明矣斯其矯弊不以道之過也王者之道不貴乎太寬亦不貴乎太察太察則善者或不能自容太寬則惡者或可以苟免二者俱政之弊不足以為中道明帝失之察章帝矯枉而兩失之然章帝之心稍近乎寬非明帝比也漢四百餘年歷二十四帝稱善治者僅數人而章帝與焉其功德可少哉且猶不



能盡善也今有善弓惜其偏而欲矯之也必問諸弓人豈智之不若哉其智專且習也欲矯天下不求天下之士而問之謂之智可乎章帝賢矣惜其不得天下之士而輔之也

嚴光

君子之處世必平仕則忘其身必平不仕則忘其民忘身不智也忘民不仁也皆非君子之事也譬之水之在川通則流障則止隨其所遇而水不與力焉故隱不求名仕不規利各當其宜而已嚴子陵之不仕光武或以不事王侯爲子陵之高子陵豈爲名高而隱者哉使有意於隱而偃蹇不用以邀人主之尊禮則樊英之流釣祿位之禍耳吾知子陵不爲是也賢者非事君之爲難而行道之足貴故量其主而後入察其幾而後動不使吾君有得賢不仕之譏吾身有竊位負國

之愧子陵與光武布衣研席之舊知其志趣德量之淺深審矣苟光武推誠善任子陵甯不少貶相輔以濟斯民乎以其事觀之不任三公而政歸臺閣大臣以切直死者有之羣臣以非讖而見罷黜者有之子陵剛介人也不默默以固位必諤諤與之爭光武豈能堪之與其用而使入主有疎薄故舊之嫌則孰若不仕以全君臣之義哉此子陵所以爲君子而後世莫能窺其本心者也王良友人誚良曰不有忠言奇謀而取大位何往來屑屑不憚煩也嗚呼爲此言者其知子陵之志也乎易曰君子見幾而作子陵近之

竇武

禍恆發於太忽而事多敗於不斷爲天下之大事者當畏可恃而危垂成不以已之有恃而易人不足以彼之不足備而肆

志故所舉無不成而身完功立竇武之謀誅曹節王甫其志可謂忠矣而身不免受其殃世常悲之不知武有以致之也宦官擅政天下之所同惡也陳蕃及同謀之士天下之所稱以爲賢者也女爲太后而身爲大將軍以天下之賢而誅天下之所惡宜乎去之如拉朽發腐事之成可以萬全而卒不成者以恃其可成而忽之也宦官之威行於中外久矣其根榦盤結宮省甚固爲誅之計當使策謀預定於外一旦會在廷之臣白太后及帝縛而夷之如雷霆之擊山嶽之壓使之不暇生變拱手伏辜則不盈朝而大患去矣今武則不然自五六月謀之至於九月而始發言於太后者再三而蕃復上疏陳其罪惡請太后宣示左右及攻其同黨不嚴爲之備而從容歸府使宦豎得發密奏劫帝爲變其失計不已甚乎

執犬於牢猶恐其噬而以兵自衛况節甫宮省久吏烏可謀誅之而不爲備哉武蕃之賢非不知此特忽其不足畏故耳爲計既疎遂使太后變遷身亡家滅海內賢士戮殺殆盡而漢隨以亡其智雖忠其才不足稱矣小人之謀害君子其爲心忍爲慮周爲計決故君子多不能免君子之誅小人持以不忍之心行以疎略之計而不虞其足以爲害故反受其禍者甚眾此天下所以治難而亂易忠義之士於是無所成功也有國家者可不慎其始哉

崔寔

昔者觀孔子之書見其於子貢仲由之徒善於說辭必深折而重抑之明足以億事未爲有過也而傷其多言以任爲學未爲違道也而惡其口給而近佞心常以爲惑矣孔子不貴

於言若是耶及觀戰國之際天下之士皆棄道德仁義而不修以口舌磨切世主而覬勢竊柄大者亡人之國小者自殺其身又甚焉者著為邪說以為後世害紛然出乎斯道之外流於刻薄荒鄙誣民敗俗之歸而不自知也然後喟然嘆曰此孔子所以聖乎其預知之矣凡亂之生必有所始也芻蕘之弊必至於以人殉葬象箸之弊必至於瑤臺瑤室孔子之教人以勿易於言而周卒以口舌縱橫之辨而亡夫言豈可苟哉快意於一言或足以禍萬世發憤立一事或可以禍異時矯當時之失不求古今之變而輕於持論非知道者也彼崔寔者獨何人哉憤時君之柔闇則論柔闇之失可也遽為邪說不顧理之是非而謂凡為治者必以嚴而治以寬而亂此豈理也耶周秦之效六人之所能識也寔不察乎此而亟

稱宣帝之賢夫宣帝漢室基亂之主苛以為明忍以為斷督責以為能當斯世也斯民競知其可畏而不知其所可愛於是高惠文景之澤竭矣譬猶服金石恣聲色之人其外雖若未衰而其中之虛壞已甚至於元帝繼之稍失其術則漢因以衰非元帝之罪也寔輕信而不知道敢為異論而不顧其無稽至誣文帝以嚴治平何惑妄之甚哉漢之久而亡者文帝之功也且使宣帝處文帝之時是生一秦也宣帝固非秦比也率其所為行於甫定之世則其異於秦者幾希而豈能治哉治道固有本末先之以政教而後刑罰者秦漢以下皆是也文帝能參之恭儉忠厚之化故治其餘則守法而已故未旋踵即不免於危漢室至於光武猶再榮之末其膏澤將盡矣明章能扶植培壠之僅至少康孝安以降漸衰而亂固

其理也自非仁賢若文帝承之猶恐其不救而寔欲濟之以嚴刑峻法此欲救將萎之木而斷其根鄙哉愚儒好高之論也仲長統乃從而稱之此其知與寔何異哉自孔子之末學者不明道而阿世韓非之愚至以堯舜爲土水而以刑罰爲膏粱所聞者卑而所習者陋無怪其爲此言也漢之諸儒惟賈誼董相及王吉爲庶幾如是與統時人所推爲大儒而其論至於與韓無異於乎其所從來遠矣豈特寔之罪哉

馬融

馬融以通經術稱名儒既事梁冀復爲作章奏請誅李固節義喪敗而不惜蓋其心在乎利祿也然卒不免冀手未幾髡笞徙朔方二者無一得而徒取惡聲孰若不食冀祿之爲可哉苟謂事冀爲不獲已當其欲害李固杜喬之初毅然引大

義而爭之以此得罪死有餘榮曲附姦回以圖身利而終蹈乎禍豈不足爲患失者之戒乎

趙苞

趙苞爲遼西守鮮卑劫質其母而攻其城苞曰昔爲母子今爲王臣義不得顧私恩力戰破之母遂遇害余曰苞善守宮矣然而未知義也千金與盈尺之璧孰重人必曰璧重而璧之積與千金孰重人必曰千金重璧固重於千金矣以積而敵千金不可也君固有重於親者親亦有重於君者使守一城而君在焉城存則君存城亡則君亡寇雖劫母以脅降吾盡死以存君可也苞之所守者漢之君性此以爲存亡乎抑土地而已乎如土地而已土地者璧積之類也固不宜以此易母而不救也况善於謀者未必失君之土地乎彼鮮卑者



衆多而可以計取性貪而可以利誘其質母而攻城也所欲  
得者貨財耳能出數十萬賂之而以母爲請彼樂得吾之利  
未必不從者也苟利未足盈其心則求而避之彼雖得吾城  
吾徐以計攻之未有不勝者也不此之圖而使母死於寇手  
雖可以存天下君子猶不忍也況一城乎義者合乎道而宜  
乎人心之謂也不可以固而不知變也棄母以全城與全毋  
而棄郡其非義則一然不若棄母之愈甚也權其輕重使合  
乎宜上不失親下不失業惟達於義者能之惜乎苞之不足  
以及此也

評劭

不以窮達易其守者君子也不以治亂改其節者良臣也屈  
挫於困約者必不能不歸於富貴處衰世而爲亂者豈能效

忠於平治之時乎許劭謂曹操爲治世之能臣亂世之姦雄  
昔人以爲確論余意劭特畏其劫而陽爲好言以悅之耳姦  
黠之人譬之虎豹豺狼明主在上制之以法束之以威虎豹  
豺狼之去元夜而就白日特不敢肆其噬嚙而已豈遂化而  
爲麒麟騶虞也哉夫能臣者以義處其身以道事其君惟以  
忠國家成事功爲職而身之禍福用舍不與焉如漢諸葛公  
唐之郭子儀者近之矣故受任於敗亡之際復起於退閑之  
餘有蓋世之功而欲然不居挾震主之勢而人不知忌彼其  
存心積慮一本乎至誠而不以絲毫之僞雜乎其間是以上  
而君安之下而民悅之其功業之盛卓乎無繼者以是故也  
彼曹操者以權詐爲智以巧譎爲略寓誅殺於嘻笑藏猜狠  
於簡易此其事主御人應物達變者舍詐與譎莫先焉故雖

梟張烏合於一時能盜漢之天下而不得天下之心使其遇  
英明之主譬如彭越之歸漢李密之降唐亦終為誅滅而後  
已何也為能臣於治世固當為亂世之治臣操何德而堪之  
吾故曰劭之論劫於操而發耳非所以論操也

### 華歆

士固有德有餘而不善用者然操履不失乎正雖不長於用  
無害其為士也若華歆者專制一郡拱手而見奪於人其才  
不足稱矣又不能固守而役於曹操為之弑天下之毋此誠  
小人之無恥者而當時謂之有德有德者固如是耶史乃以  
其少時鋤地得金視而棄之與管幼安揮去不視分優劣幼  
安百世之士清介之行老而不衰與其初志正稱以歆比之  
不啻犬豕之於神龍懸絕甚多世俗論人概以小廉細謹信

其大節早年所踐料其平生義士仁人不以可欲惑志而好  
名之士多飾詐以釣名夫豈可不深辨耶

### 諸葛孔明

以庸常之人而問於賢人君子者人之情也以賢人君子而  
求所不及於庸常之人此非人之恆情而君子之盛節也為  
天下之大事者必力行乎眾人之所難勉使所為果有服乎  
天下然後可以驅馳籠絡天下之士而用之苟無以大異乎  
眾人則為人役之不暇何暇用天下之士哉諸葛孔明以布  
衣至於為相而人不以為為速以討賊為已任而不任將帥人  
不以為為自用兵敗而功不成人不以為為無勇斷一國之政賞  
罰予奪無所貸人不以為為專世皆謂孔明才智之可以服人  
而不知不自肆其才智而取諸人此孔明之所以服人也三

國人才吳爲眾魏次之而漢又次之然漢之孔明二國之司馬懿周魯張陸之徒皆不能及當是之時天下一孔明耳而無所與讓及其爲相顧乃深有資於僚佐而懇懇求忠益之言以孔明之賢豈待乎僚佐之益舉全蜀之士豈復有出於孔明智慮之右者乎賢人君子之用心也道而期望也大常自見其不足而不見其有餘常恐已闕之不聞而不敢謂人言爲不可惟不自恃其才智也故能用舉世之才智苟露其才智與人角錙銖分寸以求勝則有才智者皆吾敵也吾安得而用之孔明之爲相欲然虛已以求聞已之過秦漢以下爲相者皆不及也而陳壽之徒比之爲蕭何豈不辱孔明哉事功之成敗不可以論人也久矣禹稷與天地並而顏子陋巷之窮人伊尹佐商有天下而伯夷餒死無以自存其身之

所處殊其所爲又殊其志之所向亦殊孟子獨謂顏子可比禹稷伯夷與伊尹皆得聖人之一偏若孟子可謂善觀人矣夫善觀人者不以所至爲優劣蓋成敗利鈍天也天之所命雖聖賢有所不能爲聖賢之道甯有不至哉其所不能者非道之過也以孔明之賢興漢而致治其素所蓄積者不幸而功不成天也安得以成敗論孔明哉推孔明之心伊尹周公之亞也而其所未至道不逮也使孔明聞道則爲聖賢矣惜乎其未有聞也於乎道不勝其才智茲其所以爲孔明也歟然其過秦漢之士則遠矣

龐統

三代之時人才皆本於學故有才者必明於道德之要知所者必通於爲治之法自周室既衰上不知所以教下不知所



以學於是人各就其性之所近而攻之而學術治才析而爲  
二天下之士明於經術者未必能見諸事功優於世務者未  
必能本於學術其弊至於秦漢之間世並以儒生爲無用而  
司馬徽之論人才亦謂儒生俗士不識世務識世務者在乎  
俊傑其謬豈不甚哉儒者之道大之無家該細之無所遺近  
不以爲易而不舉遠不以爲迂而不爲固無有不達乎世務  
而可以爲儒者也其不達世務者謂之非儒可也安可謂儒  
生不足用乎自徽所稱者觀之若諸葛孔明之言論事爲其  
不中乎道者鮮矣謂孔明非儒者不可也然徽以孔明龐統  
並稱吾竊有疑焉論者惜統早死故功業不及孔明余謂使  
統不死終非孔明比也孔明之學庶乎王道而統之言皆矯  
詐功利之習劉璋之迎昭烈或說昭烈就取益州昭烈恐失

信於天下統則請就其來迎而襲殺之昭烈之不卽從所以  
堅益州之民服從之志猶有王者之用心也統獨切切焉欲  
奪璋之位其器量何淺哉王者患乎德不宏道不洽不患王  
狹民微也昭烈居荊州之地能喻之以道俾民樂生而趨義  
吳蜀之民固將棄其主而歸之矣苟爲不然以四海之眾而  
見奪於亂臣所少者豈地與民或統不能輔其主以仁義敷  
大信於海內而導之爲齊桓晉文所爲之事其才智不足稱  
矣安在其爲俊傑哉或者以昭烈得益州故能抗吳魏不知  
其不能與漢之業者自取益州始昭烈非有四夫寸地之基  
特以區區之信義感激人心所至人皆樂從之及乎虜璋而  
據其位由是魯肅得以讓請關羽孫權得以分裂荊州而昭  
烈之聲威損矣此功名之心勝而不知道術故也先王之智



謀兵力非能遠過乎後世其能以弱制強以小服大獨何耶  
以其養才立教無不可用之學無不知道之人也夫行一法  
而使弱可強小可大雖不求功利而功利豈不遠哉而世主  
顧忽之以爲儒生不可信之言疑衍謂之善治殆猶未也

諸葛誕

諸葛氏兄弟三人仕於三國才氣雖不相類然孔明之下瑾  
與誕亦人豪也誕當司馬昭僭竊之時振賣充之說起兵討  
之事雖無成身不失爲忠義豈非凜然大丈夫乎世俗乃以  
是譽之謂蜀得龍吳得虎魏得狗爲斯言者必賈充之徒自  
以鬻國弑君取富貴爲得計論人成敗而不識逆順是非之  
辨者也豈非揚子雲所謂舍其沐猴而謂人沐猴者邪

晉論二首

書不可盡信也而紀載之詞爲尤甚同時而仕同堂而語十  
人書之則其事各異蓋聞有詳略辭有工拙而意之所向好  
惡不同以好惡之私持不審之論而其詞又不足以發之能  
不失其真者鮮矣況於世之相遠或數百年耳不聞其言目  
不覩其事身不預當時之得失意揣心構以補其所不足而  
增其所未備或有所畏而不敢直書或有舊恩故怨而故爲  
毀譽或務奇眩博而信傳聞之辭或欲駭人之視聽而駕爲  
浮辨自左氏司馬遷班固不能免乎此弊況世之庸史其能  
傳信而不誣哉苟不因人君之賢否以考其政之治亂因行  
事之忠詐以定其人之功罪而欲盡信史之言則奸邪或幸  
免而無所懲豪傑之士咸有遺恨矣司馬師之於魏莽操之  
流亞也東關之敗以司馬王儀引罪於已而殺之其暴虐不

仁狼虎而冠者耳史氏又謂朝廷欲貶諸將師不許曰此我不聽傳公休之過也諸將何罪悉有不問而削其弟昭之爵師一人也兵敗一事也由前之言則為小人由後之言則雖君子無以加之將孰據而信哉使二者俱得其實何暴於王儀而仁於諸將乎其必不然矣蓋盛德無繼者善多闕而不彰奸雄有後者惡多隱而不著師兄弟連執魏政弟之子遂奪魏而有天下子孫諱其先祖之惡而史氏亦畏而不敢直言故於師之紀傳則過稱其美於儀之事則謹志之以微見頌師之美不亦輕於信乎孟子於武成取二三策武成以聖人之事孟子猶不信而非之況庸史之所述奸雄之事為柰何盡信之乎信其所宜信而斥其不可信者此篤於信者也徒然而不知其非安在其能信乎孟子非不信書也不為苟

信乃所以善信也余非不信史也蓋學孟子而未能也微見下疑

與有有天下而無天下之慮是以天下與人也天下固非知慮之所能守也然而先王終不敢忽人事而不脩以為盡吾所當為俾無復遺失然後可以奉承天之與我之意天之予奪豈偶然哉其得也必有所自其失也必有所致天非不欲人得其全且久也然數百年而僅一見者人不能盡其道天雖欲與之而不可得也披人於眾庶而命之官孰不欲其久哉其或不免於危歟者有以致之非其君之不與也自書契以來享國最久者莫如周本於積累之深遠固然矣求其經久保大之法上輔乎天道下宜於人情山川草木之性鳥獸夷狄之類莫不曲盡而各有以處之堯舜之治不若是之詳也聖

人豈好為是煩悉乎不若此而至於亡者皆閔天之命君子  
不謂命也漢之境土分裂數十載自司馬氏父子襲蜀虜吳  
起而一之可謂盛矣其赫然南面而帝不惟識者知其宮闕  
將傾子孫不保奸雄黜胡亦掩鼻而笑之盛尤其去  
兵過蚤立子非賢之所致孰知其失有大於此者乎誠使法  
立而制定餘教遺德流溢於海內雖刻持以而諸臣  
民猶將稽首屏息而尊事之況君之嫡乎中國夷狄不使相  
消強弱富貧不使相懸上下有分內外咸敘雖揖讓而治可  
也奚獨於兵之情晉之君則不然禮失於上而不知法弛於  
下而不舉風俗弊壞而不能振教化缺失而不能脩視其朝  
則大臣分黨而相軋貪墨而無厭視其野則胡虜雜處於近  
畿而不為之防戾人奢縱僭侈於下而不知為之禁維以中才

之主繼之不能免於亂矣况駭豎悍婦居乎位而重之以倫  
類之徒犬鼠之屬哉懿師以狡計詐力潛攘默竊歷數世而  
後得僅一傳而失其十九骨肉相殘卒為夷狄所轢籍有國  
以降未有子孫受禍若此之甚為中國害若斯之酷者也豈  
非取之不以道守之無其具故耶取天下而不以道者禍必  
及其子孫漢之呂氏唐之武氏宋之金寇或及其妻子或  
後嗣幾無遺類雖人事之變亦天道之不可誣者然此三代  
者以其有守之之具故為而復安衰而復盛而晉之既微累  
有篡弑之禍以其治具之不完也取天下而不以道是以天  
下禍其子孫也守天下而無其具其使子孫禍天下也

司馬字

斯道之在天猶日月之在天也淫風降雨彌時而止日月



史記卷之五  
未嘗不行乎其間亂臣賊子恣橫乎世而天理之在人心者終不少變秦能滅六國之君而不能使六國之民不思其故主王莽能竊漢之位而不能使海內之民一日忘漢之德力可以服人身而不可以服人之心智可以據人紀而不可以滅天之道先王所以欲明斯道於天下者豈誠欲務迂遠難行之事以為觀美乎其意以為苟徒用法以禁之使不敢為邪不若使之各知斯道自不能為亂之為愈也周自昭穆以下皆可以亡國強侯伯環擁而迭興皆可以兼并然而却視疎顧莫敢發口萌犯上之言者非其勢力之不及特以斯道猶有存者畏受悖道之名而不忍也秦之土地兵力豈皆過於諸國哉卒至於劫其主而不顧者夷狄之俗教化不明君臣上下不知道也一家之敗必始於不學之人一國之亂

必興於不教之地天下之禍常發於無道之國先王必以教化為先務而不敢忽者豈苟然哉曹氏以詐力得國而不知所教當是之時斯道不明甚矣故丕獻父子坐席未暖而司馬懿已矚其旁而欲攘取之臨終涕泣托以幼孤少不合意則引其手而易其位如易偶人然公卿大臣迎合將順莫以為非積習既久至於弑君篡位以為常耳而不復怪蓋舉中國而從之矣而其宗室之中若司馬孚者獨懇欵悲痛不忍與其謀子姓為天子而身為王公可謂尊顯矣獨慚愧若不忍居者身死於晉猶願為魏之貞士夫魏之亡已久奸佞小人若賈充之徒咸以為堯舜之禪無以過而卒獨拳拳懷其舊君豈有所求而然哉吾以是而知雖大亂之世斯道未嘗亡國可以滅而斯道不可滅也求之二千載間生於逆亂之



族而不爲所變者三人司馬氏之孚武氏之攸緒朱溫之兒  
全昱皆能知篡逆之非惟攸緒辭位避去不受寵祿爲最賢  
孚固非全昱可及然卒至受主爵而不辭其歸與全昱無異  
全昱故羣盜惑於利而失其本心無足異者惜孚知忠而不  
知遷義之方也使孚爲魏而死謂之魏貞士可也魏亡而不  
仕乎晉謂之貞士亦宜也既分土而居之是與師昭無別矣  
猶欲自托爲魏臣其不智豈不甚哉雖然孚當廢弒之際不  
失臣禮使曹氏之臣皆能如孚師昭雖暴終不敢奪魏而自  
立也然則孚焉可少而斯道焉可忽哉

殷浩

自先王養士之制亡而天下無全才士之生於世者其學術  
各隨世之所尚而變觀乎世之所尚而士可知也西漢尚經

術故士多通經而達理東漢尚風節故士多能自重而不役  
志於利祿唐尚諫諍故抗直之士眾惟晉祖元虛而尚清談  
故士之生於是時者能以恬淡寡欲治身而以簡樸不煩鎮  
俗釋然有等貴賤齊死生之意王導以此興江左謝安以此  
勝苻秦庾冰王彪之之流皆此以見重於世士之用學術猶  
工人之用器器之用雖不同然利者愈於鈍有者愈於無挾  
其所聞知以應當世之事其不合者鮮矣方未用時計畫規  
度天下之得失利害素已定於心及居乎位則舉而施之如  
出物於懷入手於袖取金帛於臧而陳之中庭快乎其無難  
沛乎其不窮矣宜其無不當也若諸葛孔明范仲淹身在布  
衣而已有幸輔之志人亦以其志望之及其得志果不失人  
之所望是豈待言語而見哉以言語自表異者類多夸誕之

士若殷浩者，奉誕之尤也。人莫貴於自知，自知而後可以知人。善疑桓溫勢盛而藉浩抗之，浩自計才智可以敵溫，否乎溫握兵擅命久矣，使才智與溫等，猶不易況浩不及而居之不辭，求免於禍難矣。彼溫者志趣雖有不純，而其才足以有為，且當是時晉室之衰甚矣，使浩為相能與雖然相下說以安國家利社稷，不當以相軋而以信義喻之，溫必感奮而恢復其外，浩脩為相之職而輔其內，不越數年中原必可復也。浩不此之究而輕動自用，為不能為之事而圖不可圖之功，疎姚襄而致其敗，信敵國之間而自將以襲人，其智術之疎殆與豎子無異。固識者之所竊笑而俟其敗者，卒取廢辱豈溫之罪哉？溫謂用為令僕，其宜欲以浩為相，浩不惟不可將相，亦非其所能為也。蓋浩率易而不知國體，觀其欲殺蔡謨

固知其人之誕妄而不可有為矣。其視導安之持重嚴簡，相遠不亦甚哉？非名不足以取士，而以名取士者又多失於虛名之人。唐四夔李元平及浩者，皆名過其實者也。自古不覈名實而取名實不副之人，其不敗者幸也。

郭巨

郭巨埋子世傳其孝，嗟乎！伯奇順令申生之恭，君子弗謂孝也。大杖不走，曾子不得辭其責，從父之令然且不可。夫孝所以事親也，苟不以禮雖日用三牲之養，猶為不孝。况俾其親以口體之養，殺無辜之幼子乎？且古之聖人行一不義殺一不辜而得天下，不忍為之。故禹思天下有溺者，猶已溺之；稷思天下有饑者，猶已饑之。放麋不忍君子羨之，況子孫乎？巨陷親於不義，罪莫大焉。而謂之孝，則天理幾於泯矣。其孝可

通鑑卷之五  
以訓乎不可以訓其聖人之法乎或曰苟爲不孝天曷以賜  
之金乎設使不幸而不獲金死者不復生則殺子之惡不可  
逃以犯無後之大罪又焉得爲孝乎俾其親無惻隱之心則  
已有則奚以安其生養志者固若是歟微幸於偶耳好事者  
遂美其非義之行亂名教而不察甚矣人之好異哉豈其然  
乎或者天哀其子而相之歟不然則無辜之赤子不復生矣

王彪之

人恆病乎才略不足應天下之變才略足以應變而或不適  
平事理之宜則其病反有甚焉者是以君子不特貴乎才略  
之優而尤貴乎用之得其當譬之干將莫邪用以誅擊盜賊  
則爲義用以爲盜賊之事則爲亂用之同而所用異善惡判  
焉如水火故君子有時而智有時而愚皆以適夫義而已焉

可苟乎桓溫之於晉猶漢之曹操魏之司馬懿也少緩不死  
則篡晉必矣入朝而廢海西公是篡弒之漸也於斯之時立  
朝之士才足以任天下之重力抗大義而拒之使大鼠之徒  
無所肆其噬嚙之姦則善矣不然則奉身以死之亦可以明  
事君之節又不能然則狎狂稱疾勿預其事焉或可也而王  
彪之於禮儀未定大姦動色不知所爲之頃乃爲之草具儀  
制朝服當階神采毅然定太后令而廢其北面正嫡之主此  
何爲也哉眾情疑懼方若鋒刃之迫膚而能處之從容正色  
厲聲決以大事非勇者不能也然使彪之能以是折溫於朝  
奮笏擊之豈非剛正不屈之大臣哉助強臣以廢其主作其  
聲勢以成姦謀其罪不在郝超之下而後世猶謂彪之爲才  
能之臣才固才矣惜其不善用也宋侍中謝朓嘗蕭道成自

立使之解宋主璽綬陽爲不知引枕而臥庸才智非處之比  
然於廢興之際能全乎義孔子所謂其愚不可及者殆庸類  
邪

梁武帝

疫癘之生必自內不足者始疫癘不能擇人也內有不足則  
虛虛則自疑自疑其疾疾有不至者乎異端邪說者道之疫  
癘也其入人者外疑作虛無主而多疑者必先奸之飫於梁  
肉者不求藜藿身無罪戾者不問赦宥豈忽於味而薄於惠  
哉足且無疑也梁武帝以帝者之貴區宇之富驍雄英果之  
才力足以奪取人之國家勢足以制萬姓脩短之命及其志  
得功成願屈辱於佛乘素車食瓦器服庶人之衣冠而願爲  
其奴其志獨笑求乎蓋生於疑且悔也恆人少壯時挾勇往

之氣爲逆理異常之事以爲當然而不怪至於既老而所爲  
畢成所志盡獲其氣亦且衰矣於是追計平生之所爲可愧  
可恨者雜然心目之中思可以自贖之術而一洒之當此之  
時有告以佛氏之說者必將善而從之矣武帝以詐力攘人  
之國而弑其君滅其子姓其用兵略地攻戰捍禦無辜而死  
者以千萬計春秋既高靜思而熟念之孰非可悔者乎悔甚  
而疑疑而思釋之之道觀佛氏之說有觸於心以爲惟此可  
以贖吾之罪凡佛氏所禁者皆不敢爲佛氏所云利益於身  
者皆不吝而爲之卒至舍其身而不顧而不知其終無補於  
危亡也佛氏之大指歸於誕妄武帝之所務又佛氏之所賤  
棄者豈恆理也哉王者之法有贖刑惟殺人不可贖使殺人  
而可贖則殺人者愈多矣天之常道善惡各以類應爲惡而



知悔少貸其罪則可矣今其言謂雖窮凶極暴之人能幡然自悔則可以成佛是教人視爲惡爲無罪而啓僥倖之門也其妄不亦甚乎且有爲而爲善者爲利無爲而爲善者爲義以義存心者爲君子以利存心者爲小人利於免罪而爲善其心已陷於小人而梁武欲以此自釋固以蔽於擇術矣欲免於禍得乎使梁武稍明王道知前之所爲不足以順天服人則勉爲仁義正家而正天下子弟輯睦小民親附則可爲善國矣棄所當爲而惟異端之從蔑倫悖教無事之時子弟已叛於下身幽於盜賊擁兵者環顧而不救憤怒而相屠不至身死國亡而不已向之所爲適以爲害夫豈有利哉古之聖人不忍殺一不辜行一不義而取天下所以正其始也不取舍仁義禮樂而左道小數必屏絕之所以善其終也始以

詐力終以異端此梁武所以亡也

魏孝文

昔者舜命皋陶曰明于五刑以弼五教周人亦曰伯夷降典折民於刑豈非禮者刑之本而刑者禮之寓乎故禮之與刑異用而同歸出乎禮則入乎刑法之所不能加者禮之所取也春秋聖人用刑之書也而一本乎禮酌乎禮之中參乎其難處之變可處矣文姜桓公之夫人而與弑其夫其罪爲重故於其去魯也削其姓氏曰夫人孫于齊哀姜閔公之母而與聞乎故其罪爲輕故於其去也不削其姓氏而曰夫人姜氏孫于邾然其事雖殊而子無讐母之義則等也是以於其葬也皆謹書之而無貶辭焉其稱孫于前以正天下之大義

書葬於後所以全母子之至情皆本乎綱常揆乎人心合乎  
伯夷之典臯陶之刑而無悖者也元魏馮太后配其子獻文  
帝卯而獻文之子孝文帝宏爲馮氏行期年之喪動循禮制  
君子取焉先儒有爲異說者以爲非所當服其說謂孝文於  
馮太后有不共戴天之讐烏得而爲之服吾意不然天下固  
無無父之國而豈有無母之人哉獻文於孝文則父也於太  
后則子也母雖不慈子不可以不盡子道使太后有殺子之  
心而不果殺爲其子者尙不宜以欲殺已故而弗爲服況孝  
文乃其孫而可以父故而讐祖母乎知其親而不能推其所  
當尊禽獸夷狄之道也因吾之親以推吾親之所親因吾之  
尊以推吾親之所尊此聖賢之教所以異於禽獸夷狄而爲  
萬世通行之典也母殺其子而孫得讐是知有父而不知父

之有親也豈人情與天理乎假而不幸遇若文姜之母預殺  
吾父爲子者欲讐之則子之弑母與婦之殺夫其罪固無異  
異弑母而復讐欲爲孝而益重其不孝猶且不可故聖人於  
文姜之卒書葬以明母子之恩况馮太后直哀姜比耳母生  
之身而母殺之死者且不敢怨而孫乃欲追讐其祖母斷絕  
不服喪果何義者乎論者徒知父之讐不共戴天而不推孝  
子之於親縱受其虐不敢疾怨固非常人之比苟惟伸子之  
情而不明父之於母猶吾之於父是惟知有父而以祖爲路  
人商鞅韓非之法猶不至此顧欲妄援春秋以斷之春秋之  
義曾若是戾乎故馮太后之殺子固獲罪於春秋而非子孫  
之所得讐也孝文之盡心平喪禮其於禮也合矣其於人子  
之情厚矣孔子曰人之過也各於其黨觀過斯知仁矣聖人

於人之過求人而論者乃於人之美而求其過其亦異乎聖人之教而甚於責人也哉或曰子無警母之義固然矣唐之武后論者惜五王不告于廟而誅之何也曰馮太后之惡惟在乎殺子故孫不得而警之武氏滅唐之宗廟社稷殲唐之子孫易唐之國號是唐之篡賊也子雖不忍警之唐之祖宗其舍之乎五王為唐討賊中宗勿與知焉其可也是亦春秋之意也故春秋之法罪輕而不悖乎禮者不以公義廢私恩惡大而為天下所不容者不以私恩廢公義能舉事物之輕重然後可以用春秋不然其不受誅於春秋者鮮矣

崔浩

子路問成人孔子答以臧武仲公輸若三人者之所長而必謂文之禮樂而后可其意猶若不足於此者始誦而息

之以為何成人之難如此耶既而得其說然後知聖人之言窮萬世而不可加損也徒智而不能無欲則將舞其智以為姦徒勇而不能無欲則將恃其勇以為亂無欲而不能燭之以智行之以勇則將局為狷固陷於愚僻而終不能有成兼斯三者而又有禮以節之樂以和之庶乎合於君子之道矣不然三者特一行耳操一行者天下豈少哉秦漢以下諸葛孔明視成人為近之張子房備是三者而禮樂不足謀海內之事無遺策可謂智矣而未能不離乎詭棄三萬戶而不受辭權利而不居可謂無欲矣而未能不近乎矯報警秦項之間不遺智力可謂有勇矣而未能皆合乎義然比之當世之士則無過子房者矣固一世之傑也若聖賢之大成則豈如斯而止哉拓拔氏之崔浩嘗自謂其才可擬子房而稽古過

之浩信多智矣。不肯屈爲之臣。及遇高祖。則曰沛公始天授。遂從而輔之。不去。子房非苟云爾也。君子莫先乎擇主。有濟世之術。而不知擇可輔之主。則爲棄其術。遇可輔之主。而無濟世之術。則爲速其禍。高祖寬厚長者。子房知能用吾術。可以有功能。不受其位。可以免禍也。故天下既定。則欲引而去之。使君臣之間坦然無疑。昔之料敵制變。出人意表者。今皆斂戢。韜秘不使毫髮發見於外。說客謀士之態。一旦化爲醇儒。靜士而人不之覺。高祖雖欲疑之。豈可得哉。此子房之智也。浩之主夷狄之雄猜暴之虜耳。而浩之術又皆出乎推步占驗。譎怪恍惚之說。參之以揣摩縱橫之辨。智術蓋於其國。權勢行乎羣臣之上。使人主忌其智。同列畏其威。固有致禍之道矣。況重之以專挾之。以私觸其所甚諱者。暴之於外。

而身不知退。卒取族滅。豈足異也哉。子房既智而守之以無欲。故全浩以智濟其欲。則歸於不智而已。人之有智。猶地之有水。然用之順其道。物資之以生地。利資之以成。苟無以制之。則浪溢泛濫。適足以爲地之害。君子之爲學。必也本乎仁。由乎義。立乎其大者。而用其智。智發乎仁。義天下之大智也。不仁而欲用其智。幾何不爲。崔浩哉。

蕭懿

大臣之義。守死非難也。死而利國家。安社稷。爲難。使惟知守死之爲得。而不顧社稷國家之存亡。烏在其爲大臣也哉。齊東昏之惡。浮於昌邑。王遠甚。率其所爲。亡齊決矣。蕭懿之人。爲尙書令也。誠有忠蓋之心。告於宗廟。擇其昆弟之賢者。如寶寅輩而立之。而廢東昏。以侯選第。則齊祀可延。姦雄執兵。



柄者雖有跋扈不臣之心亦無自而作矣懿則不然知其主之昏狂而不能爲之計斂手就戮而卒無益於天下惟憂其弟之爲國患而竟亦莫之能禦也雖曰守死不二而豈足爲忠乎雖然晉宋齊梁之間強臣陵上不少願忘視廢辱其君如易奴隸缺勢可以爲亂而不忍爲也其才固短於應變而其執志不回豈非亦可尙哉

甄琛

人君之職爲天養民者也然一人至寡也天下至眾也人君果何以養之哉惟用天之所產以養天民而已五材百物不能自察其可用而用之故人君者導之以取之之方資之以用之之要使生乎天地之間者不至於無用用天下之物者不至於無節此君人者之職也後世人主不知其職在乎養

民而剝民以自養凡物之適於用者盡籠而取之而與民爲市於是茶鹽之類皆屬於官而責其稅於民民弗惟不蒙其利而橫被其害者多矣此豈天地生物之意耶元魏甄琛請罷鹽池之稅其言曰一家之長必惠養子孫天下之君必惠養兆民未有爲人父母而吝其醢鹽富有羣生而權其一物者也善哉乎斯言天下名言也而當時羣臣有沮其議者以爲其禁旣罷利歸富室而小民不獲預語其障禁倍於官司夫利爲豪強者之所擅特不能制之以法使然耳誠能爲之制俾遠近之民以口多寡受鹽立官一員聽其爭鬪之訟而不取其利豈非王政之善也哉上有好利之君言利之臣由是甄琛之言世俗訾笑以爲迂而不適於用不知世俗之所謂迂者皆先王之所取也

沈約

爲非常逆理之事者其身雖周旋俯仰於眾人之中而其心常懷慚蒙愧於獨居深念之頃方其年壯氣盛猶可以自勝及乎年邁而衰氣餒而病所爲之事與所負之人或見於影響或形於夢寐凜乎在前皆其讐敵此理之自然而豈自外至哉齊侯之彭生呂后之如意司馬子元之賈陵道王凌沈約之齊和帝皆是物也而是物者非果能爲禍祟也穿窬之盜多夢牢獄巫覡之流多覩妖怪彼其心之所慮習之所積有以致之耳齊和帝之天下爲梁武帝所奪使其靈則梁武當見之矣何爲而但斷沈約之舌哉國家之勢已歸於梁假若沈約不言其能止乎不禍梁武而禍約非齊和帝能禍約也利其國之亡而賣之以圖富貴其心惴惴然未嘗不內愧

於天天固有斷其舌之理矣君子之學仰不愧天俯不怍人天與鬼神且不能違之而何夢寐之見乎故心無愧怍視死猶生也將死而覩鬼神異行者多行可愧者也

袁粲

管仲王者之罪人也孔子蓋恥稱之然至於論其功則深許之爲仁管仲之非仁孔子甯有不知者乎終不沒其善而與之者其意以爲律之以王道則天下無全人有功於王而不免於誅則人不復知尊周爲美而亂臣陵上者愈肆矣故取其事而不究其心稱其可稱者而其罪自不能掩聖人之行法如雷霆霜露雖以殺伐爲威而生物之意未嘗不寓乎其間大義與大仁兼用而不相悖人焉有不勸者乎後世之好爲言論者持法太刻而責人太備或以已之不及而意人之

皆然極排曲詆使義夫智士不獲自全乎世此大患也沈約  
齊之膏國小人袁粲宋之忠義大臣也粲拒蕭道成而不納  
結諸將而謀誅之勁氣峻節可比漢王陵王允凜然有古豪  
傑風視蕭淵輩直狐鼠耳其計之失在乎知人不審而以謀  
語淵乃淵負粲而敗非粲負社稷也使天未遽亡宋斯道成  
而夷其黨於粲何有哉其不能成功者特以威權去已道成  
之勢已盛而然非粲過也約不明其本心而文致細故以罪  
粲謂粲不肯當事門無雜質物情不接故及於敗此何足罪  
粲乎論人之事當考其時君之所好惡攝裳露脛於朝廷之  
上則為慢涉水之攝裳雖及股不可謂之不恭何者非其本  
心也宋明帝以苛暴御下不欲政出羣臣內外之臣有威聲  
者必翦除之粲不敢招權以抗其君故遺釋勢利使其君不

疑競進趨附之徒去而不與之義宜是也夫豈有  
過哉約攘利鄙夫不達君子之道觀其罪粲之言其心可知  
矣區區富貴曾何足言而求之者名節捐禮義不顧軀命而  
惟恐失之如約之所得不足以當一笑甚至於鬻國弑君以  
固其寵而卒不免悵悵而亡奚若守道以死之為愈乎後之  
患失而貪得者視粲與約亦可以知所處矣

### 周齊之事

姦雄之主國其慮患極於精微防禍極其周密除其所忌惟  
力是視不使有萌孽之存其為計莫不自以為工矣而不知  
禍患之生常出於其慮之所不及力之所不能報應之速不  
失分寸而其圖人者適以自圖滅人者適以自滅也觀於周  
齊之事何其著明哉初高洋既篡魏氏而奪其國忌元氏宗

族彊盛恐其久得民心而復興也悉聚而殺之其心以爲無足慮者矣後十九年而高緯爲宇文氏所虜高氏之族皆死於宇文氏卒與元氏無異宇文氏之計行亦自謂莫之能侮矣後五年而后父楊堅拱手奪其位宇文之族幼子單孫無一存者其受禍之酷亦如高氏焉高齊之滅元氏當陳武帝永定己卯宇文氏滅在宣帝大建辛丑始終僅二十三年而三姓相滅俱盡而無遺當其盛時氣燄熾然遷其威虐於勢窮力屈之人自意雖天不能違之而瞬息俯仰之間灰銷漸盡同歸於殄滅然後知天道不可誣也區區智力曾何足恃乎三代聖人不肯殺一不辜而取天下者非惟道之當然不忍以一身之貴富易子孫無窮之禍也故無功而得天下禍其身者也殺人以逞而欲保其國家禍其子孫者也

### 隋文帝

隋文帝以詐力取尊位其子侈縱以致敗亡君子陋之至與秦竝稱然當時戶口蕃殖國用富溢夷狄雖強大不敢少與之抗若漢唐之盛矣夫果何以得此也昏惑之主欲富國者必厚歛民以適其欲而文帝躬履節儉謂有司曰甯餘於民無藏府庫斯言也豈惟中主有所不及雖前代賢君或愧焉此非富國之本乎罷鹽酒之禁減庸調之額死罪三奏而後行刑褒賞治民有政績之吏此非戶口滋殖之本乎吐谷渾之子鬼王訶謀執其父而降則詔之曰溥天之下皆朕臣妾各爲善事卽稱朕心鬼王旣欲歸朕朕惟教以爲臣子之法不可違遣兵馬助爲惡事卓哉言乎不以小利廢大義真可以服夷狄之心矣其爲人雖猜忌苛忍而能撫有華夏赫然



續數百年之正統亦有以也哉後世人主語及秦隋則羞與  
爲比求其所爲不及秦隋者多矣此類是也苟不强爲善而  
徒羞比於秦隋使秦隋之土有知其不羞與之比者幾希

蘇威

可以生可以死可以貴可以賤者君子也惡死而慕生貪富  
貴而戚貧賤者小人也以死爲可惡甯知死有善於生者乎  
以貴爲可樂甯知賤有安於貴者乎君子之於世視生死貴  
賤如手之俯仰不以動其意而一以義裁之義宜死也雖假  
之以百齡之壽不苟生也義宜賤也雖誘之以三公之爵不  
苟貴也其好惡豈悖於人情哉眾人徇於利故好惡失其中  
君子於義也明故審於輕重也當天下之亂常以世無知義  
之士而小人眾也危邦敗國有知義者立乎羣邪之間使小

人之爵祿不足以誘刑威不足以脅則尙可以興也不然雖  
全盛之天下其誰與守隋之亡也非甲兵少而才用竭朝廷  
無知義之士而莫爲之死也輔相舊臣惟一蘇威拜伏蹈舞  
勸進頌美於羣盜而不以爲愧威在文帝時富貴已極寵遇  
已厚國危主辱力不能救則朝服立朝數羣盜之罪而以身  
死之使覬覦僥倖之徒知君臣之分不可犯豈非大丈夫哉  
惜死而不忍決屈身於羣盜其辱甚於死而威不悟然人不  
至於死不止也與其恥辱而生孰若速死之爲善乎威事功  
殆亦有可取使死得其所固隋之名臣也一陷於非義身名  
俱喪天下至今羞稱之則其生也適所以累豈不悲夫雖然  
威固不善處其身矣而隋之處其羣臣者亦有以致之古之  
人必以禮貌待其臣者豈僞爲爾哉養其氣而厲其節平居

則有犯顏忠諫之益不幸而臨禍患則可殺而不可辱甯舍其生而不敢負國隋氏父子之遇羣臣詐寵而威役之雖將相之貴少有疑隙則錐殺於殿庭之間凡仕於其時者皆挫辱之餘無恥之人氣不足以有爲節不能以自守其屈身於盜賊固勢使之然豈足深怪哉不以君子待之而能以君子自爲者惟君子爲然素以小人待之而欲望其爲君子之事此中人所難也於蘇威何惑哉

唐

有志於非常之功者必有非常之禍常者聖人之所務非常者君子之所惡而非常之功尤天道之所不與也人未嘗不欲有功也而不可有喜功之心以有功爲喜必以無功爲恥苟自恥其無功乃急於成功不顧難易而爲之天下必有受

其害者矣先王之治天下爲其所當爲而不強其所難爲使天下民物各循其性終身行之猶有不及何暇他務哉後世之君多好微功於夷狄故其衰也常受夷狄之禍而唐爲尤甚皆太宗啓之也古之人君非不欲廣地眾民非不能攘遠伐亂而未嘗以逞於夷狄者知夷狄之不可以仁義懷不足以兵力取而恐爲中國之患也甘心於異類者必有禍焉婦之子孫多死於虎學主良之術者多死於蹠嚙非惟力不武而習不精殆天道也太宗既平羣雄而盡有海內其心思立希世閒見之功以夸示後嗣命將出師獵夷虜之窟而獮之縲其酋長致之闕下襲以冠帶而俾之宿衛當其盛時自謂胡粵一家三王五帝之所未有至於元宗盡用胡人爲邊將任以疆場之事祿山思明遂因之以起而唐幾於亡其後二

百年間回鶻突厥吐蕃之寇不絕於邊郡盜賊之興卒自伐南詔始而五代四主皆出於雜胡德光桀黠遂子臨中國之主而號令宇內而晉以降受夷狄之禍亦未有若唐者也較其成功僅快適於一時而流患儲儲害歷二十餘世而不止太宗之支度始翦於武氏再覆於祿山黃巢殲之崔允朱溫芟之太宗於民有德不宜若是酷也甯知非喜功之報耶西漢之主惟武帝喜功最甚武帝諸子鮮不以惡終蓋兵之凶也久矣創業而以兵取者必有天禍喜功好刑者必難乎其後不得已而用兵若湯武之爲心在拯民而不在圖利庶乎可免哉不然是一時之功易無窮之禍也

唐高祖

人之恆情多耽於所樂而不忍會自十金之家以上推而至

於天子盡地之所產以爲富極人之所尊以爲貴其爲可樂亦大矣自能明智聰達用心於事物之表者雖十金之微猶不肯釋以畀人而況其至大者劉項以此戰爭曹馬以此而凌人之孤寡世之亂臣賊子以此陷滔天之誅而不辭皆知其爲可樂而然苟知其爲不足貴則持以與人可也而況父子之親乎古之人主眷眷於有位或除其所可愛或吝於所當與既老而諱言死將終而不立嫡者眾矣識卑而量狹不知盈虛消息之道爲宜然是以卒至於禍敗而莫之救也唐高祖固中智君也而能於天下始定之時授太宗以位而無顧戀之態豈其明達有以與聞乎道耶是蓋不獲已耳太宗以藩王一旦殺太子於宮內使其心膂武力之臣操兵至於君父之側而高祖不知其事亦危甚矣高祖之心蓋深爲之

懼潛爲之怒而知其病已下移莫可如何也於是亟以太上  
皇自號而避其迫人之勢而太宗亦安然處之以爲當爾而  
不怪吁此其時爲何時其事爲何事耶傳位之後又閱十年  
而崩高祖不能忘情於天下也審矣太宗貞觀之治爲甚美  
太宗之早得位天下之幸也其所以早爲政於天下者太宗  
之不幸也後之君子書其事於其前曰秦王世民殺太子建  
成立世民爲太子於其後曰太子卽位而高祖不與焉然則  
其傳禪之實不亦著明乎

唐文宗

人君不患無才而患德不足輔其才不患乎無德而患乎不  
能用其德有德矣無才以用之則近於愚有才矣不本於德  
則流於譎兼而備之者惟聖賢爲然自三代以下漢之武帝

中宗唐之太宗宣宗皆優於才而病於德者也元帝之仁柔  
文宗之恭儉德有可稱而才不逮者也二者均失也然揆鄉  
間之行則才不如德論天下之功則德僅可以自守而才尤  
可以有爲與其愿慤而制於人不若剛果英毅者之易輔也  
文宗之操行唐諸宗皆不能過然而無益於危亂內困於刑  
臣外削於藩鎮者何耶有圖治之心而無爲治之略有獨善  
之德而無濟世之才也治天下與爲家異謹言篤學持小廉  
守小信無怨惡於人匹夫之事得矣爲君則不然明以別賢  
否而處之各當其位仁以立政教而使宜乎民心勇以及事  
之幾而致其決智以通物之情而盡其變剛而不猛柔而不  
縱簡而不忘自彊而不勞而後天下可爲也斥李德裕而用  
宗閱訓注不可以爲明不能革厲民之政不可以爲仁可會



通記列傳 卷之五  
之幾陳於前而不知應之之術不可以爲勇蔽於近習姦佞之徒賞罰不適乎功罪不可以言智惟恭儉之節粗若可取亦特匹夫之行耳雖恥爲凡主何能免乎然自昔人主鮮能自知其過窮兵黷武則妄儼於湯武之師優游姑息則比於堯舜之政言利則以利民爲辭廢嫡則以擇賢藉口較其所爲皆蓄禍致亂之道而其心方欣然以爲聖智者甚眾文宗獨愧歎自謂不及赧獻其天資之美蓋可與爲善者也使得賢者濟其所不及豈遠不若宣宗哉然則非特才之罪也

張九齡

張九齡爲相而能使元宗無過太子不廢小人困不得志九齡出而綱紀壞唐室漸亂而幾亡國或曰九齡古所謂大臣哉曰九齡忠矣而不能擇義善事君矣而未善處身安得謂

大臣乎古之大臣正其身以爲天下準不可以位拘不可以恩狎立乎朝廷而君不敢爲非義邪佞畏伏而不可肆待之以禮則畱外貌少衰則引而去之其決於去就非不欲行道爲欲行道故必審於去就也楚王戊不設醴於穆生生日不去楚人將鉗我於市醴之不設何遠至於鉗哉然禍發必有幾人心之敬怠必有漸不設醴必至於不進食不進食必至於不命之坐不命之坐則必至於笞辱僞嘗笞辱僞嘗又不足不至於鉗而不止然則不設醴之去戮辱直毫髮閒耳烏可不預爲之計乎九齡臨事規諫近於以道事君者惜其知不可爲而不速也九齡必欲殺安祿山行敗軍之誅宰相職也且已知其有反相甯可已乎當元宗之不殺九齡宜以死爭之爭之堅不許則宜如褚遂良還笏而請元宗苟悟而從

則可除天下之害不從亦不失去就之義而無愧九齡爭之不力而遂已焉元宗以至夷甫見詆又忍而不去元宗甯不以貪富貴疑九齡哉九齡於此固可去矣及沮牛仙客之封李林甫以書生侮九齡而元宗亦深慢之無復敬禮之意其當去也明矣而復不辭終至見斥而後去何其昧於幾而不知義九齡欲留而盡其言乎則二者可以見矣欲留而行其道乎則未有待人不以禮而可以行道者也九齡之賢必不慕區區之富貴然觀九齡之事若朱能超然於富貴之外者豈其心在君與國而不暇爲身謀耶世未有誦其身而可正天下者九齡或未思之乎使九齡獲聞聖賢之道以古之大臣自望其事功必不若此而止也自道之不明通達者流於權詐卑陋者局於貪鄙求之於唐如九齡者不過數人亦豈

易得哉然則九齡雖未足爲古之大臣亦可謂唐之大臣也夫

### 郭子儀

寓高世之意於眾人之跡受天下之疑被身後之謗而不辭者君子之用心也名譽不脩固眾人之所恥而名譽大盛者尤君子之所畏挾莫尙之功負蓋世之名居危疑之地自古鮮有不敗者而郭子儀能以功名終此其人之賢宜若有特立絕俗之行而史氏謂其窮奢極欲而人不非之論者尤史氏之妄以爲子儀必不至此而不知子儀所以爲智也有忠正之心而不見信於主有安當世之才而不能使當世安乎已以盡其用皆有以致之而然耳子儀之賢其思之熟矣提大將之節奪海內於羣盜之手而歸之唐威聲震乎夷狄功

德加乎羣臣此中主之所不能無疑者况肅代之陋狹德宗之猜忌乎於是時也子儀之子猶意其薄天子而不爲則庸夫小人之過揣謬度子儀之心者多矣雖置萬喙自解於天下猶不能自明也子儀以爲使已見疑於君陷吾君有殺功臣之名不若少徇眾人之跡以自汙使君臣俱全而已獨受奢欲之名之爲愈也故其事雖類乎眾人之爲而其心實在乎安國家利社稷使巧佞之徒知己之不足疑而其君釋然不復知其爲可忌其深慮遠計邈乎不可及非真有意於奢欲也明矣而論者至今疑之望子儀太高者以爲必不肯爲待子儀太淺者遂以子儀果不忘情於利欲者而至於窮欲而至於極稍知禮義者之所羞爲子儀曷爲而爲之乎求其跡而不察其心宜乎知子儀者鮮也沛公入關而財物無所

取婦女無所幸范增疑其有大志而勸項籍急擊勿失使子儀不以此自汙寧知朝恩元載不以疑沛公者譖子儀乎裴度功名不及子儀遠甚李逢吉之黨謗其名應圖識非敬宗察之度幾不免矣子儀雖受謗於羣小而未有不以不臣爲言者尤可見子儀之智非度可望也雖然名者人之所惜也子儀受汙穢之名而不辭豈其所願哉故人處危疑之際而行不失義若伊尹周公後世之法也不得已而以利祿自累此子儀之智也亦子儀之不幸也夫

### 唐莊宗

唐莊宗以童子提數萬之師虜劉守光父子滅梁而夷其冢廟命將入蜀取王衍若繫笠之豚據千里之地而號令天下何其壯哉及志得功成勳臣外潰奴隸內叛匹馬獨出歸身

無所流矢一集骨燼靡下妻子傾散屠戮人手與其初若二  
人之爲者何也人之所持以呼吸簸運萬物之變而與之推  
移者氣而已有以養之則細入絲毫而不爲歉大塞天地而  
不爲盈挫之以困辱而不屈處之以尊榮而不驕弱壯老耄  
更易乎其身如閱一日一旦暮彼有以爲氣之主故也惟隨  
其所使而不窮隨其所寓而皆安取人之於是氣也萬物爲  
之主而反爲氣所使如喪將之兵如朝霧之氣如暴雷疾雨  
之湧水其始也非不可畏而可悅假之斯頌之時則已潰散  
消涸而不見其迹矣莊宗者非真知義與利之辨明於君臣  
之道者特假尊唐之名以求遂其欲得之心耳故其初鼓少  
年之銳氣足以眩惑驚駭庸常之人而稍自識者固已竊笑  
之矣及其所欲既充向時之銳色盡則榮然沮壞不復自振

而盡於嗜欲便佞駭夫弄豎皆得蒙覆而蔽壅之於是刑政  
隳紊表裏俱亂由其爲氣所役而莫爲之主故也均是氣也  
有所養者爲正氣無所養者爲虛氣爲氣之正者不變於物  
持虛氣以應無窮之機其有不頽散者乎有志乎事功名者  
苟不明道集義以養其中而惟用區區之虛氣求以有成非  
君子之所知也

方正學先生遜志齋集卷之五終

裔孫方農府謹校